



1.oktober 2025

UKA2025/31

Namminersorlutik Oqartussat sakkut pillugit inatsimmik allannguinnissamut siunnersuummik atuutsitsilernissaat pillugu Inatsisartunut aalajangiiffigisassatut siunnersuut (Aallaasinik il.il. pigisaqarnissamut ukiunik killiliineq kiisalu aallaasinik il.il. inissiivinnik piumasaqaat)
(Aalisarnermut, Piniarnermut, Nunalerinermut Imminullu Pilersornermut Naalakkersuisoq)

Naalakkersuisut saqqummiussa, tassalu Kalaallit Nunaanni sakkut pillugit inatsisip allanngortinnissaanut siunnersuut matumuuna Siumumiit oqaaseqarfigissavarput – oqaaseqaatissarpullu imaappoq.

Siunnersuummi siunertarineqartoq, tassalu Kalaallit Nunaanni aallaasit pillugit malittarisassat ullutsinnut naapertuunnissaasa qulakkeerniarnerannut tunngasuusoq Naalakkersuisut saqqummiussissutaani tusaavarput. Malittarisassat ullutsinnut naleqquttunngorsarnissaat ilaatigut Siumumi isumaqatigisinnaasagut, ilaatigulli isumaqatiginngisagut imaluunniit annikitsuinnarmik isumaqatigisinnaasutut isumaqarfigisagut.

Aalajangiiffigisassatut siunnersuut manna sumulluunniit sammitikkaluaraanni oqimaappoq, tassami inuiaqatigittut inuusaaserput uani pineqarpoq – qanorluunniit.

Naalakkersuisut aalajangiiffigisassatut siunnersuut saqqummiuummassuk ilaatigut tusaavarput aallaasit atorlugit iliuuseqartarnerit alianartut sakkortuullu ukiuni kingullerni arlalinni pisartut, tassalu aallaat imminut toqunnernut arlalippassuariarluni atorneqarsimavoq, aallaasorsorluni toqutseriartoqartarsimavoq, toqutsisoqarsimavoq, toqunneqarnissamik siorasaarisoqartarsimavoq aammalu aallartoornerit ikigisassaanngitsut pisimapput, taakkunannga inuppaaluit ikilerneqarsimallutik – ilaanni toqumik kinguneqartartumik.

Soorunami aallaasit atorlugit alianartorpassuaqartarnera assut ilungersunartutut tigusariaqarpoq aammalu soorunami isumannaatsuunerunissamik iliuuseqartariaqarnerunermik aalajangersaaniarnermiittoqartariaqarluni.

Siunnersuummi anguniarneqartut ilaat oqareernitsituut isumaqatigaagut, tassanilu isumaqatigisatta pingaarnerit ilaat tassaalluni aallaasit imassaallu tigoriaannanngorlugit ataatsimoortinneqannginnissaannik qulakkeerinninniarnaq aammalu isumannaallisaanikkut pitsaasumik malittarisassaqaarnissaq.

Siumumiilli unneqqarilluta oqaatigerusutarput tassaavoq meeqqat qaqugukkut aallaammik paarisqaarsinnaanerannut atuisussaataitanerannullu tunngassuteqartut siunnersuummi matumani anguniarneqartut isumaqatiginnginnatsigit.



Siumumimi isumaqarpugut ukiorpassuarni aallaat atorlugu piniarnermik ingerlatsisimanerput matumani aamma sukateriniarnermi oqimaalutaasariaqartoq, aallaaniarnej piniarnerlu kulturitsinnut ilaalluinnartuuneri eqqarsaatigalugit.

Meeqqat piniartoqarfimmiut aallaammik tigummiaqarsinnaajunnaarsillugit aalajangersaaniarnej tulluanngilaq akuersarneqarsinnaananilu. Isorliunerusuni nunaqarfippassuarnilu inuusaaseq ataqqinarluinnartoq matumani ilaatigut innarlerniarnejarmat Siumumiit akuersaaruminaatseqaarput, taamaammallu ukialuit matuma siorna *Piniarnej aallaaniarnerlu pillugit inatsit* suliarineqarmat Siumumiit tunngaviusumik isummagut attappagut, tassalu piniartoqarfikkormiut mianereqqissaarlugit aalajangersagaliortariaqarnerput.

Inatsimmi allannguutissatut suliaqarfigisatsinni matumani nalilersorluagassat annertummata suliap Inatsiseqarnermut ataatsimiititaliamut suliareqqitassanngorlugu pinissaa innersuupparput, aammalu ataatsimiititaliami sulinermi Aalisarnermut, Piniarnermut Nunalerinermullu ataatsimiititaliamik pisariaqarfiisigut suleqateqarsinnaaneq ammaffigalutigu.

Taamatut Siumumiit oqaaseqarluta Naalakkersuisut siunnersuutaannut qujavugut.

Anders Olsen, Siumut.